

113 年全國語文競賽臺灣客語朗讀文章國中學生組（海陸腔）

編號 3 號

【幸福个味緒】李淑娟原作

幸福係麼个味緒？有人會講，係放學時節轉到屋下，對灶下傳來个焢豬腳香味；也有人會講，係阿爸下班過後撫身个臭汗酸味；也有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，當奇妙个係，佢總係做得摻佢兜个回憶園共下，食著、鼻著共樣味緒个時節，回憶乜會跣等像戲齣樣又再過放送出來。

佢爸在佢讀國中三年生个時節過身咧，因為發現肝癌个時節忒慢，已經第三期。佢辭忒頭路拖等著病个身體做年零个治療，扒下佢姆摻佢兜兩兄弟就轉長山賣鴨卵咧！阿爸分佢印象最深个毋係長壽菸个味緒，毋係醫院肚吊大筊射¹个藥味，嘎係佢个手路菜「番茄炒雞卵」个好味緒。

阿爸个「番茄炒雞卵」一定愛特別用臨暗頭市場賣伸个、有靠傷个、嫋嫋个番茄，因為該下頭家愛收攤咧，會半賣半相送。佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，

合等該綿綿嫩嫩又黃淲淲个雞卵，還盲落嘴就先吞口水咧。該香香又酸酸甜甜个味緒，單淨攪味就做得划忒兩碗白飯，這幸福个味緒一直園在佢个記憶裡肚毋會散忒。

阿爸做化療該段時間，阿姆天盲光愛先去送牛乳，正趕去工地做小工，無時間煮飯。佢摻老弟輒常食白飯傍醬菜、豆腐乳、魚罐頭，係無就泡麵加一隻雞卵。阿爸愁慮佢兜營養毋罇，刻耐仔忍等身體个毋鬆爽煮菜分佢兜食。逐擺酸酸甜甜个味緒食落肚，佢个心乜跣等酸酸甜甜，甜个係阿爸惜子个心意，酸个係，毋知還做得過食加幾多擺這幸福个味緒？

對佢來講，幸福就係「番茄炒雞卵」該酸酸甜甜个味緒，佢總會帶出佢最深、最甜个回憶，分佢看著阿爸黃蠟个面容頂高掛等滿足个笑容。這下佢又乜最驚食著這樣菜，因為佢驚食忒多別家个「番茄炒雞卵」，會害佢毋記得記憶當中阿爸留分佢个味緒，該阿爸惜子个味緒，佢摻阿爸共下个幸福味緒。

¹ 吊大筊射：音 diau[~] tai⁺ gong sha⁺；吊點滴。

113 年全國語文競賽臺灣客語朗讀文章國中學生組（海陸腔）

編號 7 號

【風搓日】張慈媛原作

還細時節，見擺堵著風搓日，就係偈爸愛出門整電火楯¹个日仔，也係歸宿舍婦人家膠細人仔共下搵手接電話个日仔。

偈爸在臺電食頭路，整電火楯个時節，愛膠腳踏釘插落逐隻空仔裡肚，正做得手爬腳蹶上去頂高做事。堵著風搓日又係風又係水，一下仔就無電咧。臺電个工作人員接著電話，就愛煞煞著水衣去修理。在電火楯頂高涿水搶時間，該斯正經愛請佛祖保佑，正有好安全下來。

老古人講：「七月落水又起風，十隻柑園九隻空。」一隻風搓落來臺灣，電線分佢吹壞忒，臺電服務所个電話就毋識停過。工作人員做下出去修理搶通電，辦公室既經無人咧，電話還係響毋會煞，麼人去接？就係偈兜戴在宿舍个家眷。男仔人出去修理，婦人家帶等細人仔全部在辦公室輪等接電話。打電話來个人，大體係打來罵人个，問講：「做麼个偈這片个電還言來？偈魚塘裡肚个魚仔會死忒咧！」偈心肝肚想，恁暗个夜，偈爸在風雨裡肚个電火楯頂高，偈也當想偈爸平平安安煞煞轉來。新聞主

播在電視裡肚提醒大家，係無要緊个事情莫出門；偈爸嘎顛倒愛遽遽出門。

俗話講：「風來從風，雨來從雨。」年堵年來拜訪个風搓，教偈兜仰般接待這隻逐年來个人客。該兩時，氣象報告係通知有風搓愛來咧，大家定著愛用踢埔²貼窗門，煞猛準備蠟燭、泡麵，還有餅仔這兜較燥又耐放个東西，續下來還愛承水。因為風搓來就表示會漚水、蔭水、停電，成時還會停水。幾下日無法度出門，所以，一屋人生活需要个東西愛準備好勢。

社會緊來緊進步，風搓來以前，政府會提醒大家，莫行兼海脣，戴在山區个人愛注意屑泥落石³，社會大眾个安全漸漸仔分人重視。祝福每一個人像偈爸樣，逐擺就平安轉屋下。

¹ 電火楯：音 tien⁺ fo⁺ dun⁺；電線桿。

² 踢埔：音 ted bu⁻；膠帶。

³ 屑泥落石：音 o⁻ nai lau⁻ sag；土石流。